

**EKONOMSKO SOCIJALNO VIJEĆE ZA TERITORIJU
FEDERACIJE BOSNE I HERCEGOVINE**

Broj: 03-34/14- 4037 /24
Sarajevo, 08.01.2024.godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 09-01-2024			
Org. jed.	Broj	Priloga	Vrijednost
05/1	- 02 -	557	23

Gdin. Admir Čavalić
Poslanik u Predstavničkom domu Parlamenta Federacije
Bosne i Hercegovine

PREDMET: Odgovor, dostavlja se

Poštovani,

U vezi Vašeg poslaničkog pitanja, koje ste postavili na nastavku 4. redovne sjednice Predstavničkog doma Parlamenta Federacije BiH od 21.12.2023. godine, obavještavam Vas kako slijedi:

Tačna je Vaša informacija da tokom 2023. godine nije održana niti jedna sjednica Ekonomsko-socijalnog vijeća za teritoriju Federacije BiH. Razlog je što u prvom kvartalu 2023. godine nije bilo sjednice, jer se u to vrijeme konstituisala nova parlamentarna većina, i shodno tome očekivala se uspostava nove Vlade Federacije BiH.

Vlada Federacije BiH u starom sazivu, sa tadašnjim premijerom gospodinom Fadilom Novalićem, obzirom da je bila u tehničkom mandatu, nije pripremala nikakva zakonska rješenja, te Ekonomsko-socijalno vijeće nije imalo materijale o kojima bi socijalni partneri raspravljali.

Poslije konstituisanja nove Vlade Federacije BiH u aprilu 2023. godine, pokušao sam sazvati konstituirajuću sjednicu Ekonomsko-socijalnog vijeća (šestog saziva), te shodno članu 17. Sporazuma o osnivanju Ekonomsko-socijalnog vijeća za teritoriju Federacije Bosne i Hercegovine ("Službene novine Federacije BiH", br.47/02,42/03,8/08, 13/08,51/08,40/10,10/11), uputio pismene pozive socijalnim partnerima, kako bi se to realiziralo. Sindikat i Poslodavci su izrazili spremnost da pristupe konstituiranju Ekonomsko-socijalnog vijeća u novom sazivu, međutim Vlada Federacije BiH nije odgovorila na taj poziv. Pozivi su ponovljeni u više navrata, pismeno i usmeno, ali iz Vlade Federacije BiH do danas nismo dobili nikakav odgovor, napominjući da je takav gest suprotan članu 17. Sporazuma o osnivanju Ekonomsko-socijalnog vijeća za teritoriju Federacije Bosne i Hercegovine, kojim je utvrđeno da su socijalni partneri u obavezi održati konstituirajuću sjednicu Ekonomsko-socijalnog vijeća Federacije BiH, najdalje 30 dana poslije konstituiranja nove vlasti.

Želim da Vas podsjetim da je članom 4. Sporazuma o osnivanju Ekonomsko-socijalnog vijeća za teritoriju Federacije Bosne i Hercegovine decidno definirano da se određena zakonska rješenja iz oblasti ekonomske, socijalne i razvojne politike obavezno moraju raspravljati na sjednicama Ekonomsko-socijalnog vijeća. Sva zakonska i podzakonska

rješenja koja ne prođu tu formalnu proceduru, su iz proceduralnih grešaka oboriva na Ustavnom sudu Federacije Bosne i Hercegovine. Nažalost, to se u prošlosti događalo, i to u više navrata.

Zbog nepoštovanja Sporazuma o osnivanju Ekonomsko-socijalnog vijeća za teritoriju Federacije Bosne i Hercegovine, Vlada Federacije BiH direktno krši odredbe Zakona o obligacionim odnosima u Federaciji BiH, ali i Zakona o radu, kao i međunarodne konvencije br. 87. i 98. koje su, obzirom da su ratificirane u BiH, u pravnom smislu iznad domaćeg zakonodavstva i moraju se direktno primjenjivati u Bosni i Hercegovini.

Najnoviji primjer nepoštivanja Zakona o radu („Službene novine Federacije BiH“, br. 26/16, 89/18 i 44/22), odnosno odredbe člana 78. stav 3. je objavljivanje „Odluke o najnižoj plati u Federaciji BiH za 2024. godinu“, gdje Vlada Federacije BiH nije uopšte konsultovala Ekonomsko-socijalno vijeće, iako je Zakonom o radu to izričito morala učiniti. Inače, takav pravni akt, zbog navedenog proceduralnog propusta, je pravno ništavan i Ustavni sud Federacije BiH, ako neko uputi apelaciju ovom organu, će ga poništiti bez ikakve rasprave.

Da stvar bude gora, Vlada Federacije BiH je izdala saopštenje za javnost u kojem je navedeno da je Odluku o najnižoj plati u Federaciji BiH za 2024. godinu donijela nakon konsultacije sa Ekonomsko-socijalnim vijećem, što je klasično obmanjivanje javnosti. Jer, ponavljam, Ekonomsko-socijalnog vijeća za teritoriju Federacije Bosne i Hercegovine još uvijek nije konstituisano u novom, šestom sazivu i nije održalo niti jednu sjednicu u 2023. godini, što je suprotno svim važećim zakonima u Federaciji BiH, koji regulišu ovu oblast.

Poštovani zastupniče, nadam se da sam jasno odgovorio na Vaše pitanje, uz napomenu da stojim na raspolaganju za eventualna, dodatna objašnjenja. Također, napominjem da je Ekonomsko-socijalno vijeće operativno, te da moja malenkost i sekretarijat Ekonomsko-socijalnog vijeća može zakazati sjednicu u roku od 24 sata, kada socijalni partneri odluče. Ekonomsko-socijalno vijeće Federacije BiH u potpunosti funkcioniše i uredno ispunjava svoje domaće i međunarodne obaveze. Ali, nemamo nikakve mogućnosti da prisilom dovedemo socijalne partnere na sjednicu Ekonomsko-socijalnog vijeća, da rade. To nam nije ni posao.

S poštovanjem,

Predsjednik
Ekonomsko-socijalnog vijeća
Edhem Biber s.r.



CO:

Genralni Sekretarijat Vlade Federacije BiH
n/r gđa. Edita Kalajdžić, sekretarka
Parlament Federacije Bosne i Hercegovine
Zastupnički/Predstavnički dom
n/r gđin. Ivan Miličević, sekretar